

四庫全書

集部

欽定四庫全書

溫恭毅集卷十五

明 溫純 撰

雜著

脩橋募緣疏

詩陳厲揭律重橋梁矧吾三原夙稱衝路兩城對峙一  
水中分每逢淫雨滔天南北若限雖有長年三老舵艣  
無功即觀風且駐驂以望洋孰出途不褰裳而懼溺幸

值良牧力建輿梁于焉筮日以鳩工蓋欲一勞而永逸  
顧工力浩大非不日之可成而規度恢宏必衆焉乃始  
就迴首嘆往事豈其填海如秦編竹活萬生尚其渡蟻  
若宋共結同心果危波變為安瀾咸發濟川心驚濤化  
為穩步且星輝月燦映臥波之龍而秀鍾千齡即鑄石  
鏤金表戴柱之螭而聲施百禩彼希福利于冥冥無知  
之域即建梵宇築玄宮亦奚以為惟積功行於昭昭見  
在之途雖蠲一財出一力終有善報願以方便法同作

坦行人

救荒募緣疏

伏以亢暘淫雨在昊天豈免常乖軫瘁恤災念達士諒  
同斯志慨茲邦之不幸乃黎民之見殃終歲不登三農  
無賴致茲鄉聚多困饑寒迨彼流移尤成乞丐蒙袂輯  
屨率貿貿然而來鬻子拋妻將紛紛然奚往久饑得食  
者欲死枵腹望門者日多雖鄭俠所繪之圖不苦於此  
即秦伯乞糴之歲猶裕于今言之痛哉吁其極矣所幸

天無盡戕厯邵父西土之憂人非常辜舉長孺淮南之  
策顧民衆難周於官帑而力襄可繼于私家士類起而  
作倡民庶詢之僉協博施濟衆實有感于孔言廣募隨  
緣不妨托乎佛旨敬告十方大衆一代高賢齊發好善  
心捨穀米或石或斗共成普濟願使老稚不壑不溝蓋  
人間百樣皆空能保錢財為已有而眼底何人非我忍  
看路途有尸行與其遺所不知以作兒孫馬牛不如食  
所同胞以贊化工萬一為富不仁為仁不富將安處焉

死而生之骨而肉之端有望矣

樂進來先生贊

先生之容溫矣而肅先生之衷折矣而夷當來氏兩先生之崛起也如埧如麓先生讀父書為邑文學何難步青雲之逵乃竟以文學終嗟哉其數之奇追憶立雪之年先生與吾師雖先生實莫逆胡為乎面命之言猶在耳忽隔幽明而成今昔夫其終也自以數預決其期及整幘慨以俟而竟不爽人益信先生之前知於乎苦海

無岸執幻成戀安得起先生九原而為世剖一定之算也乎

我東唐先生讚有引

處士於余同邑里別號我東賦性剛方言動以禮于親孝于弟友少習舉子業竟以孤廢後稍稍操觚為歌詩善晉宋帖又善論事里中有弗平者輒投牒當路不少遜避即里中人亦有不之官府而之處士平者蓋陳太邱之流也邑大夫谿田馬公山左趙公每

嘉其為人余亦欣然羨慕之庶幾有隱君子之風焉  
碩人李氏端慤靜淑足稱良配令子山人奇宰述厥  
行求讚於余余與山人善知處士迺為之讚並讚碩  
人

於惟處士氣融神與少而儒名中焉賈處聳聳山立翹  
翹鶴舉以孝以友允文允理望之儼如飄然無侶於乎  
斯人也觀其行則方聞其風則起殆庶幾乎鄉之善士  
古之遺逸者乎



記稱軻母史頌鴻妻溫溫碩人垂範中閨始相厥夫終  
成厥子令德令儀鍾茲雙美瞻彼徽容金輝玉理懿哉  
淑媛可讚在此

襄陵王季公墓表

萬歷甲戌十一月丁亥襄陵豫齋王季公卒叅政梁君  
綱銘其墓矣時仍故封稱文林郎安邱知縣居三年子  
陝西副使應吉以御史起草土還臺遇上嘉禮成上兩  
宮徽號覃恩始贈季公仍文林郎陝西道監察御史蓋

又逾二紀而不佞純始表其隧上之石季公諱用中字  
道行豫齋其號徐訓導達曹令璫鄉飲賓天祥實季公  
曾大父大父父也世世衣冠冠裏陵士族季公生而穎  
異鶴形望之知其非庸衆人弱冠折節從塾師受毛詩  
日記數千百言籍裏陵諸生意猶不可諸生業去而工  
古文辭揮洒立就試輒冠諸生且二十年為督學使章  
君廖君遴入河汾書院即書院諸生亦屬目不啻小巫  
遇大巫遁矣既遍友晉知名士益自負會有日者高譚

人祿命頗驗獨不許季公嘉靖中例拔諸生貢成均季公以次當貢者再不就八試澤宮竟不利如日者言久之始應庚申貢授保定新城訓導新城諸生故不受約束季公至則飭躬砥行以示之趨又為規條令不得越越有罰諸生始駭疑既訓習安焉刺賢書者接踵居五年自都御史監司以達郡邑長吏爭推轂無敢以名位加者既副使舉乙丑進士知安邱季公倦遊會遷博野教諭亦不就歸日從諸山人樵牧間蝸蠻腐鼠不入夢

者久之先是副使苦安邱難圖歸季公移書誠曰兄弟  
以烹鮮和民以冬煦待士以完璧持身它毋足慮者副  
使唯唯竟以安邱顯名入為禮部尚書郎尋改御史按  
畿南江北遷河南叅議至今官而御史時則以季公暨  
母梁孺人養長安邱誠之如在安邱時故副使為御史  
歷藩臬名益顯而人歸誦季公不置其晚神益王五官  
之用等於少壯謂上壽不啻遽一疾不起距其生正德  
丁卯八月己丑年六十八識不識咸欽欽流涕純獨以

季公有不朽者曷憾蓋世甘宦若飴不惜垂老折腰覬  
倖不可必得乃季公心知檀雖馥不能逆風即日者誇  
嚴引為左券與擁臯比寧解綬不做令副使做若景叔  
之望子明其氏同其世行亦同矣朽耶不朽耶曷憾純  
故與副使同舉進士同令東齊莫逆又同入計歸謁李  
公于新城學舍目擊季公以冬煦待新城士者蓋躬自  
有之而舉以誠副使也宜表矣

建陝西會館祭告諸鄉賢辭

易崇性行詩重先民矧為國寶範我後人創祠京館永聚精神節屆春秋牲醴敬陳高山仰止期步後塵洋洋在上庶鑒精禋

李氏慶餘圖贊

有引

李氏姑王婦溫蓋吾邑所稱雙節者云王稱未亡人時年二十有八耳當其時伯子生甫八年仲子二年季子猶然在娠其後三子以王力竟成立而王亦以節著聞里中溫蓋余再從姑也蚤失仲子獨撫其歲

餘子汝正亦成立嘉靖中督學某公檄縣旌王扁其  
楣然未有聞之當宁者蓋閭閻隱行不上聞類如此  
汝正舉孫所親各持牛酒為姑婦圖往賀蓋曰汝正  
蚤舉孫皆姑婦餘慶云余為揚圯俟觀風者采焉贊  
曰

惟古立孤曰趙宣客嬰為其難煜煜史策王實比德家  
用阜昌有美三鳳奕葉芬芳仲婦曰溫從一于李婦復  
依姑雙節並美嬰以丈夫興趙猶難矧茲閨閣鵲立雲

端食報持券充閭有慶耳孫繩引積德之證豈天故奪  
二夫君令內行彰又故昌二夫君後令世知天道報應  
之常也耶

共學編引

余竊繹孔門直罔之辨孟氏養直無害之說考亭先生  
晚年謂天地生萬物聖人應萬事直而已矣云者而知  
直之一言實堯舜人心道心精一執中之流派也蓋執  
中之旨不外率性而其功盡於直養總之集義則直則



繇仁義行則喻義則一而性情內外天人毫無隔闕不  
集義而襲義則罔則行仁義則喻利則二而性情內外  
天人若分胡越故魯鄒立論為似是而非非為恣肆立  
隄防也世方力宗二氏弁髦魯鄒為無奇而或操戈甚  
則以恣肆而託之乎率性雖得二氏之微者亦厭鄙之  
宜魯鄒之門不道蓋有以似而掩非之實又有以非而  
襲似之名掩之不可襲之尤不可襲義不可襲似尤不  
可無他不直故也歲辛丑得汝南蔡弘甫共學編蓋家

居時揭館弘道與門弟子約者類與余意若相發明弘甫聞余說亦謂不謬可為步趨魯鄒之梯屬余括其說為引於端固余意也時弘甫方讀中秘書與余比隣相與約從日用實地以融徹性靈從闇然隱處以周洽宇內又從史弘甫益廣其旨而布之弘甫蓋余故識於諸生中者兒子知又與弘甫共學成均莫逆弘甫兄穎倅聚甫亦知學以藩幕攝吾邑執禮于余甚恭蓋父子兄弟若膠漆之投已廿年所而今方日相印證又欲以其

帙寄聚甫於穎寄予知於秦及諸從遊者使異地無隔  
闕相與北面魯鄒而祖堯舜宜不出直之一言亦以求  
自竟吾學非專為諸共學者增發孤也

刻齊民要書引

孔子曰道之以德齊之以禮有恥且格有味乎其言之  
也德吾何有有先王之禮在學士家日誦說宜興起者  
衆窮鄉委巷黃童野叟以經曲禮道之難矣故遵聖諭  
行通俗歌附諸賢闢風化詩文併世傳八行圖家禮節

要庶幾易曉而以勸農桑終焉為民不富不可與教也  
儻亦有味吾言而恥且格者乎雖然遺厥本矣民即以  
徒言責我我何詞今以往吾守吾禮而已矣吾脩吾德  
而已矣

重刻陝西同年叙齒錄跋

往吾儕偕計蓋六十有五人其年劉敬甫舉順天敬甫  
既秦人遂相與為同年交故今錄偕敬甫為六十六人  
云錄有古原月溪二先生叙叙告誡吾儕同心締結意

甚具然歲久萍梗獨三載八覲及就試南宮始一會會  
又不人人至即純十四年中僅一再與乃聞問慶弔不  
相及則大都然矣錄刻秦中時布未遍故今或併其錄  
無有特相與增正刻之都門遍布焉今以往奉二先生  
言相質對使千里如面世世講好者其在斯錄也與其  
在斯錄也與

懷淨土詩跋

釋氏說淨土與吾儒誠意若相發蓋人之身有土意是

也妄念起則穢矣烏乎淨彼以淨土為西方極樂國者  
託說也故心無穢焉往非淨土何必西第西來意欲忘  
吾儒曰勿忘夫勿忘矣而又曰勿助則其效可逆睹矣  
中峰和尚懷淨土詩百八首蓋學淨而若忘者子昂書  
其要者於卷亦心手兩忘得山陰筆意武林人相傳以  
為二寶不虛夫學而不可不至乎忘者獨釋與書已耶  
命鑄之石

溫恭毅集卷十五

欽定四庫全書

溫恭毅集卷十六

明 溫純 撰

祭文

祭冢宰陸五臺公文

天祐皇明聖神聿起誕生哲人以輔天子於鑠我公鍾  
靈樞李其真諦西來之密付其家訓宣公之嫡旨其論  
諫古人之遺直其文章天下之至理其溫如春其重如



坻其虛如谷其靜如水蜚英騰茂敷歷三朝生輝閣沕  
流澤枯涸司空崇秩獨峻孤標恂恂迪道諤諤樹幪故  
相當國奪情起復或勸小貶鼠腐鵷嚇惟忠惟孝中嘗  
激烈拂衣引謝怡情綠埜雖笑傲東山之墅猶壁立浙  
江之鐵慈航登岸公論丕昭皇睠耆彥銓衡簡超玉絃  
調字六典計僚擎天之柱負海之鰲力請得謝冥冥高  
騫一區之宅五畝之園徙倚茂密掬弄潺湲名臣欲盡  
一老僅存品其清節李固陳蕃計其細行管寧邴原共

祈元老還佐神堯柰何川嶽暝色箕尾飛搖天胡不相  
於斯文而遽殞此堂堂之賢豪雖然我公結解漏盡本  
覺明妙千鏡同室普度互照公來現身公去振臂我有  
榮枯公無生滅捨之則藏死而後已公今在天其得之  
矣嗚呼公晚南歸吾儕西轅江雲渭樹間道寒溫追惟  
契合蘭臭之言始或冰炭竟若弟耳聞山頽淚如河  
翻辦香千里庶幾招魂

同祭冢宰陳心穀公文

山頽木壞我心惻惻嗟我昊天不憖老成惟公碩德應  
運休明龍章鳳質蚤歲蜚英振藻南國煜煜二京甲第  
奮跡白日高名試政比秩凜如寒冰尋轉銓曹甄別惟  
精採華取實曰鑑之清䟽滯黜幽曰衡之平有赫丰標  
胡墨不驚帝曰賢哉賴汝股肱晉之太常重譚翰誠陟  
之柏臺萬里專城雷擊電迅殲于厥猩霧霽氛消掃于  
厥鯨帝曰賢哉用汝作羹留都召還四牡彭彭旋登太  
宰表率彤庭百僚師德八柱天擎三紀敷歷漠然宦情

謝政賦歸鴻翥青冥鑑湖初涉綠野方營崇蘭結佩鸞  
鶴相迎軒車蹟遠葵藿心傾東山雲白北闕風馨云何  
一夢殞彼長庚國思耆老朝憶典型兼而有之死哀生  
榮金蘭結侶道義同盟思公之德無忝月評仰公之猷  
無愧歌賡追公之逝誰繼鳳鳴南望江國泣淚將零聊  
持桂酒遠進瑤觥靈几日夕總帳風生池榭長寂泉戶  
重扃隴岡淒淒雙舄雲旌

祭宮保大司空葉龍潭公文

於戲維公睨睨名世碩彥瓊玉流黃文武為憲當其策  
射金馬璞獻瑤琨附公驥籍如登龍門鳬飛花縣露覆  
江邛邁戴星之宓父誇製錦之天孫計部含香蘭臺改  
玉攬驄馭以澄清盼中原而紆矚松哦琴琴李官項項  
郎署留都專城約束滇越臬憲暫借褰帷盧龍邊馬蹠  
躩雄飛膚功卓異帝眷蕩巍晉秩遷鶯系陟中丞黔秦  
甘肅節鉞提衡鈴柝晝靜邊塵不驚則有寧夏之役字  
酋縱橫公赫斯怒整旅提兵躬折衝乎千里震韜畧于

長城凱歌露布刁斗月明殲鯨鯢而授首繫跋扈以獻  
廷帝曰俞哉予嘉乃績晉右司馬總制邊陲耿耿元勲  
尚書八座莞樞水衡薦加宮保喉舌股肱國之元老方  
冀秉鈞儀型百辟天不慙遺商山對奕嗟南海之冥茫  
悼羅浮之空碧純也意氣同胞睠茲年譜疇撫三秦曰  
維翁祖聞訃涕零夢蝶遽相為國哭公生芻在簞篲毛  
兮方來洋洋兮如睹

祭宮保中丞李漸菴公文

嗚呼惟公學業德望識度操履應運而生為國之紀斯  
皆談在人口播於人耳今所叙者契知而已嗚呼言念  
生平求其友聲締結管鮑論世朱陳公息余嗣燕爾婚  
姻四海兄弟如公幾人伊余筮仕公在考功嶽峙淵澄  
有巨源風余亦硜硜喜直恥通他人則嗔乃公實喜以  
公特達忘我頑鄙莫逆之交實從茲始余忝瑣闥公職  
謄黃接影天衢休沐相將言相切磋韻擬笙簧庚午之  
秋余忤當路紛紛掉臂投石罔顧惟公急我誼高千古

及余遷楚尋同拂衣惠而好我攜手同車渭水洋洋可  
以樂饑無何壬申聯轡于征公撫齊越余歷寺卿地遠  
心通方期憚力會又忤時嬰疾斂翼公歸自越余歸自  
燕相顧而笑並賦考槃嗚呼浩浩世途是非同軌齒牙  
相軋波瀾四起公獨靡他心如止水風雨如晦雞鳴不  
已以膠投漆如弧有矢所以綢繆見于生死甲申再起  
又忝同徵公督漕運余叨理卿復從公後出監於浙實  
塵是步罔敢踰越余茲執憲亦公是程明月之珠光照



後乘嗚呼人生百年升沈聚散交情秋雲倏忽變幻乃  
余與公生同時居同里而又同志葭莩之親金蘭之誼  
四十年如一日而未始或易佛經云凡有業結無非因  
集與公緣會豈是偶然撫今追昔涕泣漣漣嗚呼知已  
凋落從古所悲故匠石廢斤於郢人伯牙輟弦於子期  
公老而吾里之稱前輩長者已落落若晨星公沒而所  
謂晨星者又將就日而益零未申之間司馬魏公南院  
胡公相繼長逝曾幾何時公訃又至嗚呼風妬喬柯霜

摧暮莖老成云謝何資典型踽踽涼涼余何能為情嗚呼哀哉念余欲從魯鄒形色天性之旨以遡虞廷精一之傳獨公解頤且從臾余以必為庶幾不落於言筌而會太宰孫公枉過預訂他日歸來共質此學于二華之下于是遂開愁別之襟再息分歧之駕詎意短景未果良辰不借竟鬱結于深衷倏淹淪于大化嗚呼哀哉良友逝矣余亦華髮聞公之喪方食哽咽况目擊時事可喜者少而可悲者多痛賢人之長往感人事之蹉跎能

不使余胸石擣而淚金波嗚呼在疾不省於亡不臨舉  
聲增慟哀有餘音語及公息泪益沾襟

同年合祭司馬中丞趙寧宇公文

嗚呼自古豪傑動闕世運生為名臣死為上鬼樹掀揭  
于天壤壽芳馨於汗史斯固賢哲之厄而德仲抱真以  
亡愧嗚呼德仲西蜀人髦藝苑宗盟左袒月旦茂實蜚  
英鳴琴百里比部廉平殿上惠文秦粵福星八閩起神  
明之頌兩都崇鎖鑰之名入貳虞工鼎望彌騰建牙特

簡定難楚荆狐狸罔號鱣鱣不舞江漢澄清朝端推許  
考晉司馬且召還部詎意逆宗跋扈強掠上供人臣無  
將國法難容蜂擁威脅莫撓其鋒意欲開導理諭賊焰  
益播天星示變適丁陽九之禍嗚呼推心置腹自古所  
難利鈍禍福當事罔譚豈乏明喆氣數攸關哀徹雲夢  
之澤泣斷瀟湘之援奏牘上聞舉朝驚怖逆更鴟張天  
子震怒彼潢池之盜弄諒不渝時而就捕遐思宸濠不  
道孫許殫忠未及百年楚孽長鯨而正蒙難明夷艱貞

惟帝念忠優恤殊勲前後輝映雖亡亦存身騎箕尾氣  
壯山河充塞宇宙耿耿不磨所稱名臣上鬼非耶嗚呼  
德仲能以精誠動天地而不能格叛逆之宗能以威望  
孚中外而不能弭猝至之變能信於列省之民廟祀尸  
祝而卒為楚事以殞其生蓋所能者天所不能者人情  
切年誼心懷國艱言之於邑歟鼻摧肝忠魂何在千秋  
容與望雲一奠神其格只

祭大司空淮海孫文恭先師文

嗚呼哀哉樹伐需材大道貴夷津梁不作孰指我迷篤  
生先生為世真儒悟在象先拓我廣居追惟筮仕讀書  
中秘及拜夕郎抗直當世出按豫章奸墨辟易視學闕  
中文章赤幟純時弱冠實侍絳幃不謂散樗國士被知  
歷遷蜀楚保釐聲施岷峨頌德雲夢繫思南北藩臬聲  
稱藉甚遂拜中丞撫治是任兩鎮鄖陽如木斯蔭今上  
拊髀召還中禁廷尉未幾進陟南宮侍講經筵教習辟  
雍時有啓沃上為斂容迺戀親幃辭陞引躬上念老成

典刑攸寄召起陪京司空是昇謂即登庸翱翔鼎司和羹鹽梅庶幾無愧天胡不憖遽殞其生訃聞之日中外動情閭里罷市縉紳涕零國有卹典士無師承嗚呼痛哉世豈乏才亦豈乏賢其根不沃光寧煜然先生學孔妙契言筌默識慎獨體仁邇源近世學派先生要矣聖人有作或弗易矣純也飲醇廿年於此習氣為累毫無踐履念于先生三沐芬芳青衿歲餘日侍門牆受約於耶則部涑陽受教於京則官奉常昔在一堂猶多扞格

今業死別安望聚樂即把遺言以求領畧恐躡前踪欲  
追復却嗚呼痛哉梁木其壞兮喬嶽其頽斯文中墮兮  
圖書凌夷晒懷春風兮抱心孔悲鬱瞻南斗兮潸然涕  
洩萬里遣使兮生芻一束地不能縮兮悲不能贖含愁  
夜雨兮五內若斲山川間隔兮爰訴我曲

合祭少宰盛公丈

嗚呼公故將家也代有干城至於公獨以文顯為華國  
侍從之賢初業麟經蓋從故相馬文莊公于二華之巔



未幾先後登第又先後讀中秘書不啻如和凝衣鉢之傳既接武詞林以至少宰修史橫經疇不仰如椽之筆又疇不歸啓沃之益于講筵時文莊固嶽嶽于其前而公亦與之比肩世方以天速奪楊綰為文莊惜胡公又捐館舍于在疚之年譬彼二華俄兩頽焉吾西土相業首姬公歷漢唐宋殊多名筌其在我明二百年餘猶未有竟舟楫鹽梅之用者如公且旦夕爰立而又即俾今例爰立惟詞林吾西土詞林著者前乎公有高陵綏德

二丈簡尤坎壈而俱不延豈天不欲吾西土踵故芳躅  
故使我詞林諸君子獨鬱抑而不宣抑山河百二之靈  
有所注故有所挹即文簡文莊及公猶不能勝未定之  
天所為公慰完名考終世珍良史而家富遺編國恩從  
特錫祭營封易名增秩與任子將哀與榮而兩全箕裘  
之託薦上國者二而讀父書與垂髫者亦玉比潤而芝  
比妍衡士二闡以人事君其得之公與公及門者如拔  
茅而以其茹連凡此皆可不朽所以亡而未嘗亡知公

已嗒然含笑於九泉而獨純等方營菟裘于涇峨間冀  
公佐道化因令吾儕安臥忽訃至不能不追感今昔而  
繼之以涕漣蓋為國抱蒼生之嘆其不堪聞隣笛而睹  
梁月也豈徒以年誼姍姍之故而然

合祭劉南嵐年伯丈

嗚呼河嶽毓秀哲人誕生誕生維何咀華吐英爰遊藝  
苑早宴鹿鳴既屢試宗伯而竟落莫如函牛之鼎而以  
雞烹當其製錦于晉則以懸魚持已以烹鮮臨民庶幾

追密縣之卓與中牟之魯迨晉別駕佐股肱郡而佩呂  
虔之刀也僉謂今之王祥故任未滿考而即委潤于紫  
荆時肅皇帝篤親親之仁為諸侯王置相于崇以為非  
公不可而公之曳長裾于王門者三十有五年蓋已過  
穆生之不遇楚而視賈太傅之弔屈大夫于湘流也尤  
同官而異情即今王槐竇桂芬馥競爽既已接踵連第  
以世臣世家名或起草民部為德齊越或才藏武庫胸  
富甲兵世但云三葉同仕于公家僅見而不知公之治

民與為相若曹平陽之相齊清靜不擾者實以致天道  
默佑于冥冥蓋平陽相齊九年而為漢相公相崇三十  
五年而僅增秩以故于公則若挹若除於子若孫則若  
注若垂宜其天錫純嘏齊喬松而未艾胡為乎鵬鳥之  
見夢亦星隕而山崩嗚呼無草不萎無木不傾莫壽于  
殤莫夭於彭矧福壽之攸同兼子孫之繩繩不朽者神  
委蛻者形至人不死大夢長醒記玉樓於天上騎白驪  
於地旁不則煉形太室吹簫緱嶺取牝牡於容成又不

則御風鞭霆興雲致雨駕烏兔而長征彼寓形於宇內  
猶大海之浮漚也曾孰枯而孰榮論交令子墨榜同升  
嗟老成之永逝欲再覲而無憑嘆國相之難繼將疇依  
兮典刑炙雞絮酒永訣生平且以盈虛益損之數知公  
後有常虛常益之徵又以清靜不擾之政疑公逝有出  
世超玄之能公如不昧其嗒然以鑒繾綣之虔誠

祭司農郎雒陽翟先生文

於乎哀哉先民有言無德不酬矧純荷先生之洪造蓋

覆載之與侔何期萬一之未報而先生遽返乎蒿邱百  
年道義獨抱深憂慨念今昔涕泗交流嗚呼哀哉純學  
愧瑣瑣識阻敦塾如尺澤之鯢榆枋之鳩迺曩歲先生  
宰藍邑入棘闈而試驂騑秉精明藻鑑將網乎琛球神  
鑒之而托夢恍徃哲之與遊先生謂示象之在茲謬於  
鼠腊而見收駕馬先騁乎康莊鹿鳴側耳於呦呦然且  
期之徃哲進之大猷謂勲名之不朽庶無愧于前修純  
今尺寸未樹恐重貽門牆羞況乎崦嵫掩照泉壤悠悠

悵函丈永隔嗟予小子其安求嗚呼哀哉先生少負瑰  
奇探玄尋幽文華炳蔚絳螭翠虬出宰百里則龔黃卓  
魯之儔入司國計則崔狄裴劉之籌斯蓋沖和精淑之  
氣瀾漫乎中州毓茲賢哲展淵抱而保金甌詎謂位不  
滿道德與命仇秩僅止於度支之郎曹年未抵乎七十  
之春秋嗚呼哀哉人生浮世譬之虛舟純嘗聞緒論齊  
得失一死生大類夢蝶之莊周矧賢郎之克肖誇雛鳳  
與棟牛據先生之夙抱竚者三槐之遺休此日歸仙諒



先生之罔怨尤而純所以咨嗟痛悼如割如裂者身羈  
官邸築室無繇荷子雲之雅誼愧侯芭之綢繆望千里  
以告哀慚九章之宋謳惟求來者之可聞庶幾不負知  
遇之獨優先生有靈其子鑒不

祭來望之職方君文

嗚呼緬維凌霄靡究厥材繁是豐城躍而復埋疇俾其  
全竟嗇夜臺人之云亡憂從中來感時撫事能不興哀  
維君誕生嶽靈孕甫弱冠擢辭雕龍繡虎健翮搏風影

纓繫組出宰濠梁膠東步武行者思歸居者安堵尸祝  
在人口碑在路天子曰休戎事爾輔睠彼東陲海陬阨  
塞稅使鴟張沸胥虺螫爰蒞雙旌蠡爾脅息商悅於途  
士程於式溟渤波澄肅慎重譯遙睇雲山鬱葱改色刃  
甫發礪神理旋效萬石華鍾寸莛始掉屈指勲名黼黻  
廊廟芳訊甫聞倏焉訃告草木皆哀朝紳共悼維君家  
世蟬聯疊疊雙鳳齊鳴瑞世耀里遠步中丞伯氏直指  
嚴君吹篴貳郡濟美維君妙才嶽嶽五鹿問學淵源譚

天災穀已未成名實踵故躅介石匪如獨振流俗余辱  
君交道義三世葭莩金蘭比隣依倚余飽風塵君方繼  
起心儀常存君才罕儔三事同升余庶可已殞我良朋  
大屢斯圯嗚呼傷哉百年同盡有涯者生千秋為烈不  
朽者名雖恨厚施而僅薄食位不配才年未配德亦見  
顯設而底豐功謳吟迭應貌象無窮競爽象賢矧多令  
子大亢宗風君為不死君故達天聞言滋慰亦恃生平  
誦言如對靈爽不昧引滿一卮秦雲渺漠燕月淒其撫

歎山河寧哭吾私

祭劉太翁南嵐先生及李太夫人文

於乎翁母不可作矣往純同諸年家子哭翁於邸謂翁  
相業大類曹平陽參然平陽將兵多殺戮比相齊始如  
蓋公教以獄市為寄何能如翁司訓得士心宰邑佐郡  
得民心相崇莊王及今王得上下心平陽之後窰奇時  
襄宗僅龔侯何能如翁子運使君孫武選君皆以進士  
起家與翁同官中外平陽相齊以戰功多而遠之也既

以不擾聞始相漢疑信半矣何能如翁以身殉國受主  
知自未艾至耄卒而為之殮葬置祠祀春秋王曰安得  
愛君憂國如先生者知臣莫若君信矣蓋公坦夷簡靜  
本天性虛舟涉世且以身為寄故所至人歸之而在崇  
定儲功尤著宜崇之兩王眷倚優禮翁歷三十五年彌  
篤非世之曳裾王門者所敢望也翁今與運使母同歸  
窀穸定萬年之居焉母故少翁一歲其借光剪衣篤舊  
睦親及佐翁服官狀不一宜翁敦歷五十餘年無內顧

色康神王若仙也純曩從公遊汝南見翁貌謂百歲不  
啻或同歸里而侍巾履於泉石有日乃今從運使君執  
紼歌薤露蒿里為幽明之隔耶純頃扶吾母柩過陽陵  
與運使君相向哭因哭翁母今哭翁母亦不能不哭吾  
母純葬吾母因葬其妻李與楊運使君今襄大事亦失  
鳳侶兩地慟傷不待臨几酌酒而已涕泗交頤天何酷  
虐我兩人以至此極耶蓋純同運使君與計偕又同舉  
進士膠漆金蘭不知其姓異故於翁母始而頌繼而些

以至於慟然翁母箕裘既盛福澤方來行有寵錫以光  
馬鬣又以此為翁母慰翁母有知其弭節以鑒純之衷  
誠也耶

祭大宗伯馮用韞公文

嗚呼凡人有生疇不有死可死而不可以死者惟公而  
已公立朝典禮樂如夔侍講如正叔較士如永叔條議  
時事如子瞻有一如此皆可不朽而况兼之死烏乎不  
可而獨惜乎時方多故如風浪中之舟疇其作大楫而

為宗社倚若公者何以死哉嗚呼天之降割于正類亦  
酷矣豈日者泰山之頽為公兆而遇此龍蛇之讖預驗  
于公余不知天道何心予之奇而令數僅止此豈造物  
忌才或玉樓成而需長吉為文以紀豈天未欲平治天  
下也乃為不雨之雲而令草靡豈公自喜逍遙也與南  
面王結侶而棲而厭塵滓嗚呼公之不可以死也中外  
咸惜更使余心愴而悲不能已蓋余之與公家世習也  
自令斟鄩始公登第目成即莫逆即參商未嘗不快公



之翱翔千仞也庶幾即正師席而兼端揆辛丑大計余  
役西臺公實以儲相而佐銓曹矢殫厥心以扶廉植善  
心未嘗知有爾我語未嘗不罄底裏蓋余之病傷易而  
公之病過思余懼公思而易竭公亦懼余易而招尤雖  
公疾革余杜門未嘗不兩相藥而求萬一之濟其最關  
情者國事之日可虞而人心之日不可挽也公今已矣  
余亦將歸而西矣徒使公抱無窮之憂而余亦不知有  
何從出之涕嗚呼公卒之前余夢公容若步如昔即以


慰公謂疾且起今若此始知前兆如鄭康成夢令起起云耳然公之精靈於昭于天也必凝而為日星為河嶽不然亦啓帝聰而納公之遺疏也庶幾登斯世于上理嗚呼余與公深矣夙昔心相期為靜定之學以求吾儒第一義而以憂時故謂相切磨有日也比公疾亦數以此言告而公亦數領之然竟不延昔人所為終身之憂不敢以幽明間而輒相忘者此也而暇以他詞誄嗚呼哀哉

祭王仲山年伯丈

嗟乎先生不可作矣純自髫年即聞海內有仲山先生已同先生子吏部君舉進士已又同官東土為莫逆交以是習先生林泉之樂即古稱達者不過謂得移官而南一拜先生廬中而今以訃聞矣嗟乎世何有如先生者哉先生以通經博古之學守急流勇退之節當其在事藉令少抑與時俯仰即巖廊可立致顧一意枕漱泉石終其身于詩文書畫間世亦以是高先生然先生風

節令頑者廉懦者立即百世之下且聞而興起誠所重  
在此不在彼彼泉石詩文書畫蓋所託而寄焉者也昔  
人謂士貴士賤皆責在士今之士視昔何如安得若先  
生者而使士為世重也詎意世有先生而純生同其時  
又為通家猶子竟無從一見顏色也耶客歲吏部君季  
子就試來持先生一畫一刻遺純純把玩先生手跡無  
異壯時及從李子問起居又知先生丰神完健謂必且  
上壽乃無何竟不起嗟乎世復何有如先生者哉純追

念高雅則為士類惜簡閱遺跡則為交情痛痛惜交橫  
假詞陳悃千里蒿目先生能鑒之不



溫恭毅集卷十六

欽定四庫全書

集部

溫恭毅集卷

二十七至  
二十四

詳校官監察御史<sub>臣</sub>周元良

覆校官中書<sub>臣</sub>王慶長

校對官中書<sub>臣</sub>吳旬華

謄錄監生<sub>臣</sub>周世芳

欽定四庫全書

溫恭毅集卷十七

明 溫純 撰

祭文

祭中丞維涇坡公文

於傷哉兄竟舍我仙遊使筑筑純增聞笛之哀也耶追  
自乙丑吾兩人同廷尉趙君釋褐共旅食不知其姓異  
也轉盼三十年金蘭之契參商之隔幽明之感不能不

以之而惱吾懷蓋釋褐未幾宦遊各天久之既同官臺省又未幾相繼忤皆仕止各天又久之兄稍稍柄事撫蜀純亦撫越乃廷尉則捐館舍而棄吾儕當是昔吾兩人哭廷尉不可作疇意不十年以哭廷尉者哭兄純既以子影隻輪為吾慟私又以雙壁沉淵為國憐才兄碩德重望宜大顯不顯或挹而注之以壽又不壽此其故不可解徒令人疑有不可必之天故今哭兄不能不憑几而低徊頃純扶先淑人柩歸兄哭而逆之途又哭而



臨之殯所且以家大夫高年為解兄顧不少延輒先我而厭塵埃純宜從先淑人死不死兄不宜死而死純即用兄言自解何以解兄于泉臺兄直聲惠政彪炳中外且有子若孫步骨體之塵接雲程之武兄即死不死宜其屬續之辰談笑瞑目以解天殲為幸而曰我將遊乎蓬萊純睹風木念吾母睹月梁念吾友兩念交橫慟固不能已兄達者其嗒然以笑于無何有之鄉而以我為愚猶膠情于電閃萍蓬之形骸也耶

祭憲副楊崑洲先生文

於戲先生沒已二十年所而純始爲文以祭耶始先生以國士遇純純何能以國士報先生而二十年来純亦數仕數已顯晦靡定望蜀中真如天上每一念至悲感交橫客歲始從塾江今以免難絮酒往而猶不及爲文今會先生子峻蓁芬以太夫人志銘屬純不朽於戲純不能報先生又惡能銘太夫人耶然讀太夫人狀益以稔先生孝友不獨治行在周秦者種種未易述惟是純

受知先生遂有不忍死先生之憾故今見先生子如見先生銘太夫人如銘先生蓋文章意氣有所合而匪獨以推轂榮進之媒德先生也初先生觀察吾秦時與部使者大比士先生得純卷輒喜而力推轂於部使者曰不首解額不舉于是純遂首解額然則先生真以國士遇純而純亦遂以先生有今日乃純謏陋竟無能表樹以報先生如先生何哉於戲豈惟表樹即二十年來先生之墓木已拱而純不能走墓所以慟知己之淪喪先

生之太夫人享耄壽而純未能代先生及其存致一日之養先生之子若孫林立而純未能代先生存而課之學蚤令繼先生未竟之志甚矣純之負先生也純惟河南吳公治行第一以推轂賈生而人恨賈生能以治安策自顯而不能薦吳公於朝至令其名亦不聞於後世蔡公光烈典試建州得朱晦菴先生以爲非尋常人其後晦菴先生以誠意正心之學爲世名儒而因以爲蔡公重於戲先生之賢何愧吳公蔡公純則安敢望賈生

與晦菴先生今銘太夫人庶幾後世知有太夫人又知  
有先生天如假我以年尚砥礪以求不愧晦菴先生爲  
先生重者而未敢必也先生有知亦有意默牖我使竟  
不負先生諸子若孫必有鸞翔鳳儀繼先生者先生其  
可嗒然於九原也已

同祭憲大夫楊兩川公文

嗟嗟兩川公生於秦官於蜀卒於燕朝縉紳無間識不  
識皆爲悼惜矧執禮與公同偕計純與公同宦遊又俱

同秦產蓋相得謹甚即生別猶難况死別乎初聞公齋  
捧信吾兩人相對喜謂公至可握手道故比至無何病  
矣吾兩人日詣公所計已之無能也又相對為公恐公  
談笑猶日念公家事不自謂不起然竟至此傷哉公蓋  
四方人也無論蚤歲從其父直指公客楚客燕即舉進  
士環轍燕趙蜀晉申宛間且二十年身所歷道路奚啻  
萬里行且登康途為世大用乃溘然而逝徒令以郎署  
二千石藩臬大夫稱良於世哉公故喜為詩詩薄唐以

後不爲然中州稿獨思鄉悲苦毋亦反本故性乃日者  
謂公必得上壽顧竟不壽何與公屬續時子侄在側故  
舊盈門仲氏制府公相去甚近即未面而弟事公意至  
篤藉令公在途或在蜀而遭此變又何以堪然天固不  
重爲賢者困也公歸矣丹旆在前季子扶輿大河嘉嶺  
之西直指公廬在公其永以爲依若百年同盡以死爲  
樂公固習聞之且有諸薦紳蒿里之歌焉不復爲公告

耆英社同祭學博馬治溪兄文

嗚呼公胡亦厭塵劫以歸豈二豎之爲害也耶吾儕與公始而講業繼而結社可五十年即顯晦參商未嘗不目如成而神如逝當公以歲薦振鐸中州遷韓府且挾瑟而往會吾儕聚里中又相與爲真率之會花朝月夕以公爲祭酒歡甚也詎三易歲籥公輒仙遊于塵壒之外公故爲博士言有聲不第而貢貢又僅受一命年踰耄自謂有壽徵難老乃竟晝而不能不晦完而不能不碎諸子五如季常兄弟宜有白眉可無憾而卒之前雖



家窘會未嘗不握管賦詩以遣懷而寄慨即有遠適者  
輒寄所得句猶慮公以窘為念強笑語以為公解公今  
遊泉臺也恨不耄不期頤耳能不回首笑役于形者之  
苦而樂忘乎形者之大頃吾儕為公罷會或為位而哭  
于數千里之寓以致雞絮望拜蓋撫木則涕泗雙流聞  
訃則梁月增慨少選且強而會會則先為公舉一卮以  
酹形骸萍梗死生旦暮其究歸亡何有之鄉一也公今  
知之矣寧俟吾儕言而後喜如蟬斯蛻

祭安五峯表兄文

於戲純何以聞兄之卒哉純與兄骨肉戚也吾兩家以戚故又世交也夫以骨肉之戚重以世交純何以聞兄之卒哉初聞兄在床褥使使之沮上代問使來道兄不食已數日純與家大夫爲兄慮然猶謂兄偉然之軀充然之氣官蜀晉阨于下位未究而仁心爲質竟當起而享上壽寧蹴然有是乃無何而訃音至家大夫泣純亦泣蓋家大夫舊寓蜀會兄父爲純稱伯者官溫江已又

會兄官巴溫江伯弟視家大夫兄叔視家大夫於寓館  
至篤以故純自髫年執弟道于兄不啻同胞而兄諸子  
又復叔視純益篤夫骨肉戚世有之而歷世彌篤如吾  
兩家者無有也然則純何以聞兄之卒哉兄卒四月矣  
純以他羈今始走殯所痛哭以文併致家大夫意於戲  
兄爲小官即不顯賢于不官壽近七袞即不享上壽亦  
幾古稀諸子服兄訓且錚錚然立兄即死何憾顧純於  
兄之疾之卒始而慮繼而泣今哭而痛者以吾兩人之

戚非世所稱骨肉耳兄今從溫江伯地下其以純言告則吾兩家雖謂之死生交可也寧論其世

祭張槐麓先生文

於戲先生沒十年久矣而純始爲文從仲子以吊耶初先生令吾邑無論茹蘗之操迎刃之才卓冠一時即較士以國士遇純純何能忘當是時純所爲文與者半不與者半即先生數試數首純或有謂先生阿所好者先生不顧也其與淮海月溪二先生評秦士亦爲純屈一

指又意指鞭策純甚力既純與計偕謬居前人始服先生知人非阿所好而使純堅志真前免多岐之惑者先生力也何能忘既先生罷鞏昌政歸僅一通問先生於家而無報音久之會仲子爲吏部選人相見長安邸舍始知先生已仙遊傷哉於戲世孰無知已孰知已於窮居白屋如先生者耶何能忘先生故骯髒不可下官蟲官吾邑官太僕官戶部官鞏昌孤立行一意徃徃爲人中甘心焉直道難行於先生見之純既以先生知位不

為不顯而竟蹉跎歲月無尺寸表樹以竟先生未展之志即愧赧汗下何益也仲子聞宜人訃純始為文以薄祭併修闕事於先生於戲宜人佐先生力官竟食報課仲子兄弟學且通籍不須臾少延以俟命也傷哉仲子今奔歸啓先生壙以宜人祔純於先生之生不數通聞問於其沒無繇以炙雞絮酒躬致墓所而徒嗚咽獻歎於數千里外甚矣純之負先生也天假我年使不先朝露尚求所以不負知己鞭策者先生有知亦默啓我使

不更蹉跎無表樹也耶

祭徵君王子德社兄文

於戲兄胡亦惱苦海以歸抑膏肓之為害純與兄及子  
充交首講業至今四紀餘即升沉離合如石火電光乃  
金蘭之契管鮑之知未嘗不如一日雖千里如對當兄  
以歲薦起家振鐸也始而曲沃既而西塞歸來可十餘  
年純亦謝中臺政與弟編相繼入里期溫盟調猿鶴于  
清我續雄社之遺風詎意甫易裘葛兄輒逍遙于清虛

之外兄故爲博士家言哥第乃不第而貢貢又僅爲儒官  
宜注于壽壽又僅踰古稀豈天道乘除之數亦有時而  
昧仲子能文必大公門可無憾而卒之前雖手足不仁  
亦間肩輿爲社中之會會輒口期期強爲語不盡吐蓋  
其心有未展之懷而其情有無窮之慨純以初抵里多  
冗不數接膝謂未必即永訣獨慮重兄疾含淚強顏以  
爲兄解兄今遊泉也能不回首笑七十年來之苦而喜  
無何有中解發之快於戲知己凋落從古所悲故匠石



廢斤于郢人伯牙輟絃于子期子充雖貢未仕又先兄而逝故今哭兄不能不及子充有胸如擣有淚如波寧俟聽隣笛覩梁月而始增慨子充之子若侄已成名而後更未已仲子即立第純當從吏俾早成兄未竟之槩然吾三人所相期許爲不朽計者如昨日語而忽成畫餅純今亦多病惟皮骨存耳又何他望而空悲存沒之永隔與少壯之難再於戲

督撫兩浙臨行祭祖塋文

純今者奉命督撫兩浙蓋以我祖積慶故茲望浙中行  
道經桑梓念戀松楸恐人不與蒸嘗故今實切悽愴惟  
是薄肴在俎薄酒在尊泉臺有知其來享之又惟浙大  
邦以不肖純建節其地恐不勝此重寄又恐與水土不  
宜我祖考祖妣其默佑令所至安利又令厝注免於乖  
謬不失軍民之望以仰荅聖天子推轂至意亦於我家  
聲有光哉

祭王康僖公夫人文

嗚呼夫人今歸而從康僖公于幽耶夫人以名家子作配康僖公無何而康僖公不留蓋康僖公捐館之年實純有生之辰于今六十春秋矣康僖公乘箕以歸而純甫生純身世已熟黃梁而夫人仙遊夫人之稱未亡人者以而閱歷人世之電光石火蓋不知幾千萬狀而今始休矣純歷官掖垣奉常數步康僖公後塵而追之不前然師相授受康僖公固純之子濯孺子也未嘗不仰衣鉢而溯源于流康僖公不及面授純而純得之于私

淑純不及吊康僖公而吊夫人吊夫人如吊康僖公又不因康僖公而思端毅公之前修也耶嗚呼古今瞬息人生蜉蝣惟彼內則在翼孫謀夫人為王氏婦已即為母為王母為曾高王母荻筆熊丸及其曾孫為箕裘矧康僖公學問宦業已垂竹帛不朽而夫人之名亦不朽寧蜉蝣伍而享上壽又焉求耶純因葭莩以念舊追文獻之末繇故不能不為今昔之慨而汨淫淫不收

祭涇陽李夫人文

於戲夫人坤輿肇瑞婺彩凝祥金完婉婉玉韞青揚令  
德好速嬪于鴻碩警蠅謝珥相庸佐績熊九鳩哺翼翼  
肫肫瑟瑟靜好壺有令人方贊殊勲震世山斗且沐寵  
綸冠翟珮玳胡天弗憖霜萎芳年蒼虬趣駕青雀歸玄  
蕙閣香消蘭堂聲聞感額夫君痛心肉骨矧惟夫君三  
歷斷絃悲思寡和鸞續悵然又矧客邸肉骨異地太公  
驚趨撫棺雨淚純以葭莩夙稔淑貞知居甥館久依陪  
京倏邈陰風怛馬悽愴感念存歿揮涕相向有肴在俎

有酒在觴矢詞爲誄來格洋洋二媛在幽嗒然相逐幻境盡空能不瞑目

晉南京吏部尚書臨行祭先妣文

嗚呼母棄養忽三周于今矣感時追慕烏容已於哽咽也耶兒往在疚雖不得聞吾母之聲覩吾母之容然瞻依松楸猶幸有彷彿者存今且望金陵行併松楸遠矣烏容已於哽咽也耶兒日者之齊之燕之越無不將吾母與吾父偕今母不可作矣吾父日衰亦不得將之而

南蓋疇昔之官也樂今日之官也苦兒有大不堪於衷者烏容哽咽也耶始拜命兒以重違松楸且懼吾父遠行之難將終其身於丘壑乃一疏未允再疏竟格進有不可屢瀆之天聽退有不可終抑之私情時四方多虞吾父以大義迫之兒不得不治裝一往俟入春計事竣即請歸而留孫予知代兒溫清代兒烝嘗興言至此哽咽又烏容已也茲陳忌祭並以情告惟乞吾母默佑令吾父寧於家兒輩寧於官兒不勝慟切之至

溫恭毅集卷十七



欽定四庫全書

溫恭毅集卷十八

明 溫純 撰

古樂府

艾如張

鬱鬱灌木衆鳥嚶嚶臨深酌酒亦可怡情有鳥有鳥鷺  
鷺其鳴厥德耿介厥質文明嗟賈如臯但博偶聲恐逢  
鷺鳥觸樹致驚以媒下翳以艾藏形庶幾我獲爲吾友

生

戰城南

戰城南敵可滅矢及遠馬如鐵火齊熾水立絕憤乘驕  
鼓待竭衛霍生左賢折饑餐肉渴飲血幕南空漢耻雪  
戰城南敵可滅

五雜俎 平西夏紀事

五雜俎醞盈瓠徃復還脫巾走不得已及及首  
五雜俎城半虎徃復還士女殘不得已郊多壘

五雜俎勾遠部往復還帳滿山不得已城環水  
五雜俎邙歷西往復還耦盡捨不得已樓火起  
五雜俎南城促往復還矢相屬不得已自屠戮

昭君怨

長門回首淚盈襟琵琶只彈薄命吟休問丹青受金否  
丹青得無用意深君王萬幾日日有忍令粉黛惑其心  
況因丹青力暫受君王惻和戎苟有利在胡猶在國一  
時丹青手但易妍媸色古來更有如簧舌鹿可為馬白

可黑吁嗟乎鹿可爲馬白可黑如此丹青殺亦得

自君之出矣

自君之出矣晝永夜如年芳草隨時綠秋月幾迴圓

其二

自君之出矣夢中笑語并既醒還思夢復恐夢難成

其三

自君之出矣孤枕夏猶寒况聞沙塞苦秋冬衣又單

其四

自君之出矣新人易為歡丁寧語新人莫令藁砧寒

公無渡河

公無渡河陸行坦坦尚有風波河水不測盤渦實多深  
不可厲內藏黿鼉得人則食不知其他公無渡河雖有  
舟楫吞舟奈何長年辟易如見網羅不如安卧飲酒高  
歌公無渡河

溫恭毅集卷十八

欽定四庫全書

溫恭毅集卷十九

明 溫純 撰

五言古詩

紀懷并引壬寅冬仲余以糾彈乞休屢疏未允  
伏枕待命歷月多閒因仰思三聖隆恩二親  
永逝中及骨肉師友存沒參商與夫轍迹所  
經國事綢繆之計精神所注生平趨步之艱

展轉于心不能已已而歎初意可遂始願難  
酬于是改弧矢萬里之期爲山澤終身之課  
苟爲政于畎畝庶報禮于九重援筆得詩二  
十五首命名紀懷以志歲月

計偕試南宮遂上公車對時當世太平內外爭盡瘁穆  
穆肅皇聖主靜勤修內懷柔懾萬靈納言收中貴懲貪  
更訓廉信賞罰無貸嘉靖殷邦同人道萬方賴至今思  
祖功父老猶垂泪



其二

筮仕令北海海上半凋瘵初至百憂叢視事忘向晦出  
入童穉眠徒爲簿書累亦慕卓魯名愧非學道愛別來  
三十年父老猶虛戴補過恨無繇此任不更再寄語爲  
令者毋如余徒慨

其三

三年頻于役凭軾臨滄海徙倚蓬萊間几席扶桑在始  
覺眼界寬西望極畏壘天浮日永浴鴈迷岸分彩歸池

無盈虛百川于此滙始作盧敖遊高鳥慚意怠面陟大  
澤山日觀峯未改呼吸圓竅通應接汗流浹歸來燕自  
失蝸居從前悔

其四

西征將之濟延頸問闕里泰山高萬仞龜蒙亦難擬有  
阜迂以曲折濟文相似卦列少昊陵鍾靈自此始禱尼  
應如響頂圻生夫子匹夫祖堯舜千載崇廟祀荆棘故  
不生異木森且美當時手植檜榮枯關泰否呵護煩神

明感通有至理低徊瞻拜餘一貫如面擬

其五

莊皇初踐祚首重言官路徵書羅四方召從諸彥後左  
掖拜夕郎白簡容敷奏一時頌恭默納約無庸牖淵哉  
尼父言無為真聖度升遐胡太蚤遺弓泣宇宙

其六

朱明景風至銜命之藩代言陟天下眷歷晉出鴈塞上  
黨文物集朱門多風槩沁水主人奇論文出流輩踟躕

馬邑城追慨詐為害雲中節至止帶礪盟千載邂逅趙

將軍

奇

英聲無與佩接武渭陽周

尚文

出師敵輒北養

士周與雙眼

鎗名趙創

屈指名僅再賴有劉都督

承嗣

三捷威仍倍今為連砲雷一發敵盡碎省卒更省餉不  
戰功尤最先聲屈人兵庶以威為愛乃知禦侮策全勝  
在修內

其七

驅車之荆楚暫憩習家池西憶羊叔子山有墮淚碑言

尋雲夢澤荒迷不可知  
江漢依然在皤皤濯于斯  
朝登黃鶴樓暮倚鸚鵡陂  
再過巴陵道不禁先憂思  
一著歸來賦遠謝叔子規  
夢濯纓與足如在江之涯  
仲尼不可尚千載是吾師

其八

歸汴漢水西言陟太和巔  
太和萬丈烏兔疑倒旋諸  
峯亦兒孫五嶽豈比肩  
中多學道侶相與證真詮  
真詮何可得依稀守丹田  
夜夢玄帝語鼓琴寧侯絃  
汝歸有

餘師汝師言更玄無思與無為斯言信不偏北面終鄒  
魯庶幾永無愆

其九

繇鄖入商於驅車歷木末蜿蜒七百里天近海疑括崑  
崙於此終太華勢相奪坤厚信無疆鍾靈及遼濶姬歷  
八百年賢聖實超越歷代饒荃宰宇宙任旋斡晚近忽  
蕩瀟網緼氣疑脫鬱積端倪開地維竟軒豁君子期法  
坤厚德以載物

其十

入里返初服垂涕拜親闈二親方耆壽偕隱共采薇春  
秋耕南畝不愁寒與饑弟童兒方壯挾冊亦愛暉歲時  
延賓友懽讌願無違但憐姊與妹各棄屢屢歸鮮鬱開  
春酒始幸早拂衣有甥跪羅列庶免永歔歔

其十一

壬申冬拜命乘春臨大河次且峭嶮道踟躕維之涯默  
思圖與書千載永不磨淵哉坎之一萬象已森羅五十

數非闕載籍文何多南北滋路岐楊子泣奈何所以魯  
尼父無言欲回波觀象登道岸守一更無他

其十二

迺邈臨熊耳從邲及申宛遵彼汝墳境追思王化遠言  
駐隆中軫問俗頻往返恨無隨車雨覩顏如餐飯有召  
及吾師孫公節再建銅隄竹馬迎云公來何晚當年羊  
叔子步武尤蹇蹇余在約束中依舊炙經苑會有二三  
子蔡子弘甫朱子巽甫馬子長平

因依共勤懇忽為參



與商回首空繾綣

其十三

時值大淵獻罔命以綠綬入關過里門北征將父母伏  
陛瞻龍袞端拱臨星斗余從典屬國再步廷尉後旋總  
大官署六禮親奔走喜遇泰交成遠近懽盈口至今三  
十年乾坤同悠久

其十四

禮樂容臺司駿奔郊廟際有友趙柱史應元之楚正攬

轡久要故不忘相期秉忠義同歌蜀道難並失南郡意  
鮮組先後歸遂初涇城內潛修卒舊業力耕供賦稅山  
林亦有責報恩明不倍目極日月邊如睹天顏霽

其十五

初宿邯鄲署偶聞隣婦啼聲聲如有訴多云有所思不  
作雙飛鳥却為征夫妻征夫妻猶可邊塞苦誰知不愁  
衣帶緩但恐寄衣遲砧杵家家急賤妾心獨悲手紐衣  
未成衣成附阿誰

其十六

倚門有二親下車伏地拜拭淚轉開顏問訊疑夢寐乍  
聚忘遠遊囊空反增愛有美弱冠弟青衿亦聰慧隨行  
無問字二親懽更倍東覓仙掌蓮西慕瑤池會蓮實猶  
可得桃熟難更再但釀清為聖濁亦賢可待冀開栢葉  
進菊綻桑落羨張筵聚賓從門巷填車盖余舞老萊斑  
弟詠南山對諸孫爭進履椿榮萱樹背有召忽臨門承  
歡僅六載于今涕泪多不忍見松檜

其十七

渚灘爲帝理再侍講筵內未幾拜命行捧勅臨東海二  
親猶及將扶持供甘膳王事信靡盬不遑周仍隘采蓐  
更覓鯉奉養敢云備明王隆孝思永言錫吾類遵海望  
天臺偶與知己會戴汝誠手染二親容駐顏語仍在語  
及世上名洗耳有真態相期雁蕩遊撫景嘗至再歸署  
襟已豁如在塵寰外乃知乾坤裏形骸元無礙

其十八

吳山天然境天目于此會江海襟嘗合龍鳳結仍大鍾  
靈更毓秀都會千年在一水臨島夷所恃在武備余乏  
安攘策坐鎮渾無賴官聯幸同心但於簿書內民瘼尚  
未廖何論滄溟外有時陟吳巔似與崑崙對我屋居其  
間視之僅如芥恐爲形迹拘俯仰慚函蓋

其十九

視師鰲柱下尋登鰲柱上舉目溟渤盡樓船爭用命共  
恨海不波髀肉生愈忼翻思武欲修文事宜先尚邵毅

何人哉禮樂稱名將回瞻孔廟頽鼎新如始叔郡士課

文執薛子

魯叔

神尤王令如石頭城御李敏肅兒共傍

其師亦千之余愧中公望師已魁多士蔡

弘甫薛魯叔

文日暢辛丑同對庭文子

德任

亦與仇又同讀秘書鹽

梅吾已諒獨有兒予知挾冊猶惆悵盍簪兼麗澤相期

仍無量

其二十

虎林戒行李返舟停雪水旋從姑蘓城一水達都鄙中

經江淮河西自楚豫起軍儲四百萬私運亦稱此平江

陳公瑄

信多勞宋公

禮

良比美萬安

朱公衡

通夏鎮余

亦從經紀至今三紀餘舳艫爭邇迤飛輓古未有陵園  
亦寧只乃知故與利子輿言有以紛紛加菜議拘曲終  
當已誰其濬二洪行險深見底水繇地中行陵運咸永  
倚往來亦利涉朝貢疾如矢舍此談他途如車輕棄軌

其二十一

初從司農後旋領藏庾役金貯四百萬粟猶六年積人

人懷嫠恤已懼漁竭澤倏忽十年餘出多入不益粟乏  
兼歲儲金萬不及百仰給人如麻嘖嘖朝與夕司農難  
以應仰屋憂難釋廣開鬻爵例銓路懼乖隔嚴督搜粟  
吏又爲閭閻惜食寡與用舒斯言誠藥石九重方明聖  
成命正於赫屢示寬恤期四海手加額

其二十二

己丑罪逆積殃及我慈闈黃泉不可從銜卹扶櫬歸蒙  
恩予槥地又蒙享以詞封樹遂成林麗牲遂有碑附以



名人閣學許文穆公銘不朽當在茲親恩日欲報夢馮

菜子衣皇恩報更難銜結不敢辭

其二十三

捧詔領南銓始遂金陵遊仰瞻定鼎基王氣莽千秋龍  
盤連燕磯虎踞對牛頭孝陵鬱以蔥都會今稱留百司  
常拱衛南北盛二周余辱百官長表率愧前修癸巳當  
計吏但知右名流追憶郊鄆卜極目望宸旒

其二十四

夏拜冬官命承恩就子舍入門睹吾翁故顏驚彫謝嘗  
藥僅三時亥晦忽長夜皇恩慈闈並感極淚長瀉嗚呼

馬鬣封十年隣二華執秩富平孫公碑實錄執憲涇陽

李公銘匪假惟有罔極思不如從翁化鬱鬯非無酒酌  
地空薦藉

其二十五

讀禮松楸間併讀論孟語始知精一脉乃在不踰矩所  
欲惟從心危微寧異睹形色性命合鄒孟真學魯直養

開一闢作聖如導瞽上達在下學剛大豈襲取求一惟  
忠恕爲己當學古日用精義足默識敢自沮不然內外  
岐空談竟何補

題楊太宰桃花嶺

茂叔獨愛蓮淵明獨愛菊蓮爲名君子菊爲供幽獨何  
如仙人桃花灼實亦馥古有木帝精蟠山三見熟主人  
海濱居種之滿山曲的皪陋河陽紛披成綺褥結實仍  
纍纍盡醉韶華足持以啖阿母百歲顏如玉亦悟樹人

理成蹊光前躅  
竭來厭紛囂  
夢寐山中屋  
託興在丹青  
開卷霞奪目  
不是避秦時  
寧問武陵澳  
金馬且陸沉  
神遊亦可掬  
再種菊與蓮  
時時春更簇  
他日賦歸來  
綬荷以爲服  
或餐英與實  
輕身掛仙籙  
不則延良友  
花間醉醺醺  
我亦倦遊人  
求羊或不辱  
欲鼓山陰棹  
開徑待趨起

送劉衍亨宗伯還朝

裊裊琴中操  
離離沼間芷  
賞音以同芳  
飲醇忘其旨  
與

君結綢繆願言未有已膏車駕言邁謹讌方伊始顧聽  
嚶鳴聲何以贈吾子宛彼石頭城日夕生春水曉月媚  
仙舟清風拂中沚含情將訴誰扣舷鳴其衷翩翩颺雙  
翮雙翮橫萬里簪笏歸承明禮樂唯君倚漢庭今側席  
正人在端揆東觀已然藜北省亦方軌瀛海神仙宅君  
恩去天咫承顏歸省畢調鼎報天子勿以明發心鍾情  
于岵岵至孝塞天地顯揚端在此

閨思

對月默默語清光應照君記得別時約相思但望雲月  
亦有圓缺雲亦有聚散散與缺猶可離愁尚減半忽見  
雲間月低頭憶遠人相思不相見空有泪沾巾君如失  
凰侶妾如寄生草桑末猶堪依誰念君懷抱孤棲霜露  
叢忽遇花落期花落無人掃淒涼兩地知

溫恭毅集卷十九

欽定四庫全書

溫恭毅集卷二十

明 溫純 撰

七言古詩

書董生玉几山房圖

玉几去天纔尺五何緣聳立君之戶  
松檜為垣草為堂閒窺科蚪窮今古  
竭來嘯傲天之涯酒酣落筆走龍蛇  
彈鋏羞為孟嘗客無魚甘自老京華

七夕

天上牛郎夜渡河  
河邊織女手停梭  
閭閻薄命妾不語  
獨宿孤房泪如雨

登庾亮樓歌

荊州綰轂地庾亮古今樓樓吞瀟湘洞庭水地控東西  
上下流蜀吳虎闢亦雄武不得荊州苦更苦須臾勝敗  
一局碁三分事業幾丘土何如乘月舒兩眸不淺興同  
叅佐遊一入醉鄉我也無俯仰天地亦蜉蝣我今把酒



酹明月雖有圓缺歲歲無休歇曾向樓中照酒人又照  
當時舳艫旌旗之搯搯瞥見君山雲霧橫又見章華草  
木榮舜妃楚靈今何在愁聞江上鐵笛聲笛聲嘹唳特  
悽楚落盡梅花悶不語回望簷頭月已西乃知千古陳  
迹僅如一瞬許孰得孰失孰存亡孰如江月尚流光此  
樓亦難盡滿遊人興胡不乘風鼓柁窮滄海而相羊醉  
餘學李白槌碎黃鶴為狂客恐殺風景碍吾徒旋車吊  
古更于水許徧覓庾信羅含宅

峨山高壽史生母七十

峨山高哉脉結崑崙矗不知其幾千萬里山勢蜿蜒曲  
連荆山堯門而西顧兮如屏如揖中有清濁二水左滙  
而吞吐于涇渭兮如環如帶極汪洋之瀾瀾瑶池西園  
仙掌東峙船藕蟠桃徃徃開十丈之花結千年之寶玉  
女王母獨乘鸞而至止笙簫奏雲和瑤草滿階阨如隔  
塵寰遊洞天况逢秋月桂如綺憑誰覓藕更覓桃駐顏  
却老從今始覓藕覓桃亦荒唐不然且於山水之間延

兒齒釀清爲聖濁爲賢日向花前進百兒但歌南山無  
勞陟屺竇氏桂花株株香田家荆樹色色紫稱觴孰與  
顯親多男兒有身不致青雲何以移忠報天子

溫恭毅集卷二十